

Broj; S1 3 Iž 027593 18 Iž
Sarajevo; 10.01.2018.godine

Sud Bosne i Hercegovine, u drugostepenom vijeću sastavljenom od sudija Srete Crnjaka kao predsjednika vijeća, Vesne Trifunović i Dinke Bešlagić Čovrk kao članova vijeća, odlučujući o žalbi političke stranke Narodna stranka Radom za boljitak sa sjedištem u Širokom Brijegu ul. Dr Ive Pilara br. 5 izjavljene protiv odluke Centralne izborne komisije BiH, broj: 03-07-6-317/17 od 14.12.2017. godine o izricanju novčane kazne zbog kršenja Zakona o finansiranju političkih stranaka, u nejavnoj sjednici održanoj dana 10.01.2018.godine, donio je,

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije BiH broj i datum navedeni u uvodu, utvrđeno je da je politička stranka Narodna stranka Radom za boljitak odgovorna što u 2015. godini nije u poslovnim knjigama evidentirala nenovčane donacije po osnovu besplatnog korištenja poslovnih prostorija opštine čime je prekršila odredbe člana 5 stav 4 Zakona o finansiranju političkih stranaka, te joj je na osnovu člana 15 stav 2 i primjenom člana 19 navedenog zakona, izrečena novčana kazna u iznosu od 1.000,00 KM.

Na ovu odluku žalilac je blagovremeno uložio žalbu zbog pogrešno i nepotpuno utvrđenog činjeničnog stanja ukazujući da je uredno vođena evidencija o prijemu članarine i dobrovoljnih priloga na transakcijskim računima. Politička stranka je istakla da svojim postupanjem nije povrijedila član 5 stav 4 Zakona o finansiranju političkih partija jer prema stavu 3 citiranog člana fizička i pravna lic koja dobrovoljne priloge daju političkim strankama u vidu proizvoda ili usluga dužna su izdati račun na kome će naznačiti tržišnu vrijednost poklonjenog proizvoda ili usluge. Time je opština kao vlasnik poslovnog prostora u obavezi odrediti cijenu zakupa, fakturisati zakup koji podliježe ili ne podliježe naplati, na što stranka kao korisnik poslovnih prostorija nije mogla uticati. Žalilac se prilikom sačinjavanja finasijakog izvještaja za 21015.godinu morao pridržavati i Zakona o računovodstvu i reviziji mn(Sl. novine F BiH br.83/09), a pošto joj nije dostavljena faktura nije posjedovala ispravu podobnu za knjiženje u smislu članova 15, 16, 17 i 21 navedenog zakona.

U odgovoru na žalbu Centralna izborna komisija BiH predlaže da se žalba odbije kao neosnovana jer žalilac nije postupio po zakonskoj obavezi evidentiranja u poslovnim knjigama nenovčane donacije-besplatnog korištenja poslovnih prostora opštine Jablanica i Hadžići, a na koju obavezu nemaju uticaja odredbe Zakona o računovodstvu i reviziji.

Pošto je ispitalo osporenu odluku u granicama žalbenih razloga, vijeće Apelacionog odjeljenja Suda Bosne i Hercegovine je odlučilo kao u izreci iz slijedećih razloga:

Žalba je neosnovana.

Naime, iz stanja u spisu proizilazi da je Centralna izborna komisija Bosne i Hercegovine u ožalbenoj odluci na pravilan i zakonit način utvrdila da je politička stranka Narodna stranka radom za boljitak u 2015. godini kršila odredbe Zakona o finansiranju političkih stranaka (Sl. glasnik BiH br. 95/12 i 41/16). Pravilnost ovog zaključka proizilazi iz pregleda godišnjeg finansijskog izvještaja koji je izvršila Služba za reviziju finansiranja političkih stranaka Centralne izborne komisije BiH na osnovu odredbe člana 14 stav 3 Zakona o finansiranju političkih stranaka, na osnovu kojeg je sačinjen Konačnim izvještaj broj: 03-07-6-357/16 od 22.08.2017. godine u kome je utvrđeno da je ova politička stranka u 2015. godini kršila odredbe Zakona o finansiranju političkih stranaka, na način da nije u poslovnim knjigama evidentirala nenovčane donacije po osnovu besplatnog korištenja poslovnih prostorija opštine, a koji nedostatak je otklonjen nakon dostavljanja Preliminarnog izvještaja po istim brojem dana 18.07.2017.godine.

Neprihvatljivi su žalbeni razlozi o nepotpuno i nepravilno utvrđenom činjeničnom stanju jer iz stanja spisa proizilazi da se ovlašteno lice žalitelja na usmenoj raspravi u prostorijama Centralne izborne komisije BiH, izjašnjavalo na činjenice koje sadrži Konačni izvještaj o pregledu godišnjeg finasijskog izvještaja za 2015. godinu, a na kojima se zasniva i ožalbeno rješenje iz kojih nesumnjivo proizilazi da je žalitelj pekršio odredbe Zakona o finansiranju političkih stranaka. Nadalje, iz stanja spisa proizilazi da je žalitelj nakon prijema Preliminarnog izvještaja o pregledu godišnjeg finasijskog izvještaj za 2015. godinu otklonio nedostatke koje je utvrdila Služba za reviziju, pa su stoga neprihvatljivi žalbeni navodi kojima žalitelj ukazuje da zbog neispostavljanja faktura vlasnika poslovnog prostora nije bio u mogućnosti izvršiti evidentiranje nenovčane donacije kako to propisuje odredbe Zakona o finansiranju političkih stranaka. Sama činjenica da je žalitelj izvršio evidentiranje nenovčane donacije nakon prijema Preliminarnog izvještaja Službe za reviziju ukazuje da nije bilo smetnji da se evidentiranje izvrši na isti način prilikom sačinjavanja finasijskog izvještaja za 2015. godinu.

Ovo vijeće je utvrdilo da je novčana kazna adekvatno odmjerene, cijeneći da je do 2015. godine politička stranka Narodna stranka Radom za boljitak sedam puta kažnjavana, da je ekonomsko stanje žalitelja iz godišnjeg finasijskog izvještaja za 2015. godinu ukupan prihod u iznosu od 309.586,08 KM, pa je zaključilo da je izrečena novčana kazna pravilnom primjenom odredbe člana 15 stav 2, u vezi s članom 19. Zakona o finansiranju političkih stranaka.

Iz svega iznesenog zaključeno je da je ožalbena odluka zasnovana na materijalnim propisima i da je u zakonito provedenom postupku dokazana odgovornost političke stranke žalitelja i izrečena kazna koja odgovara težini učinjene povrede.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A
Sreto Crnjak